

李文忠公全書 海軍稿

卷三  
四

李文忠公海軍函稿

卷之三目錄

條覆四事

光緒十三年正月初十日

派定防軍並撥的餉

光緒十三年正月二十二日

議覆臺灣鐵路並津路借款

光緒十三年四月二十日

論綏鞏軍餉

光緒十三年閏四月初四日

論買基移堂

光緒十三年閏四月初五日

綜論餉源並山東熱河各礦

光緒十三年六月二十六日

議擬海軍章程奏底

光緒十四年六月初七日

海軍照章定議並籌津通鐵路

光緒十四年九月初九日

陳述病狀並賞匠籌捐

光緒十四年十一月十四日

議鐵路駁恩相徐尙書原函

光緒十四年十二月二十二日

醇邸覆恩中堂等函

附

議駁京僚諫阻鐵路各奏

光緒十四年十二月二十八日

海軍衙門軍機處會奏底

光緒十五年正月十四日拜進  
附

詳陳創修鐵路本末

光緒十五年四月二十日

議南北分辨盧漢鐵路

光緒十五年五月初二日

擬試行印花稅

光緒十五年八月二十九日

議駁東撫條陳

光緒十五年十月初七日

李文忠公海軍函稿卷三

全集四之三

桐城吳汝綸編錄

條覆四事

光緒十三年正月初十日

一、威海大連灣設防。上年七月初四日鈞署議覆朱一新摺內已聲明先成威海以固戶庭，次則大連灣以蔽陪都，實爲久遠緊要之計。查北洋海岸可以收泊兵船者有四：除膠州澳地偏於南姑不論外，惟威海衛旅順口大連灣三處爲敵所必爭。咸豐末年敵船北犯津沽，因旅順水淺，遂藉威大爲屯糧運取煤水之所。歷年極思籌備，而以財力不及，僅布置旅順一處。前年法人啟衅，鴻章慮威大爲其所踞，則津沽不能一日安枕。幸其兵船不厚，不敢衝旅順，而犯大沽，然此可倖遇而不可常恃者也。威大兩處水深口寬，形勢扼要，前據所雇德國魚雷官兵哈孫約，估威海布置礮雷。

一切工程需銀四百萬兩則兩處共需八百萬兩矣此時焉有如  
許財力惟現在創立海軍歲添兵艦旅順口祇可建船鳴而不可  
以泊多船勢不能遺威大不防使我兵船失此要害而讓敵船以  
屯宿之區殿下深謀遠慮籌及於此誠千載之幸茲撙節核計黨  
於洋藥釐捐併徵款內歲撥的餉三十萬作爲威大兩處購買巨  
礮魚雷水雷電燈鐵道及築臺設樓工程等用先以十年爲度庶  
幾逐歲經營威勢漸振威海則撥吳清卿中丞十一營帶原餉駐  
守尚有土石各工需費不貲卽遵

旨酌裁零星哨隊略助各營築壘雇夫之需該軍歲領部餉四十  
餘萬仍絲毫不能減少也至大連灣防務前擬調雷正綱所部帶  
原餉駐守鈞諭近有議撤雷軍爲騰協餉供東省之用者該提督  
久勞於外自以回任休息爲體恤之道等語鴻章再四籌思大連

灣之防既設卽不可撤換雷提督年漸衰老洵宜回任休息而海署供給東三省練餉爲數頗鉅久恐難支若撤雷軍回甘而騰出江浙歲協雷餉三十四萬八千兩有著之款改濟穆軍海署可稍減輕其大連灣防務卽由鴻章酌調現駐永平之銘軍前往籌布旅順後路與大連灣一氣貫注尤有常山首尾相應之勢至日韓近曰情形似不至遽有戰事萬一有警可由大連灣旅順兩處抽調水路更爲便捷總之威大兩處辦防除吳軍月餉全留外至少須由農部歲籌的餉三十萬鴻章始敢放膽爲之得此有著之款當分年逐段興辦慎擇妥員詳細勘估每年用款仍咨請海署查核奏銷此爲直奉門戶海軍根本

國家千萬年之計現當徹桑未雨之時敬請主持籌畫拓此宏規振威渤海不勝感禱上年七月海署摺內擬俟洋藥加稅辦妥務

將此款撥解俾可從容布置云云本有成議今已開辦各口藥釐  
約可歲增二百餘萬鴻章僅請撥北洋要防歲三十萬似不費力  
若所撥過少威大設防祇可暫作罷論未便驚廣而荒反啟外人  
輕視敬祈卓裁早日賜覆以便具奏至雷軍如何撤遣應請由部  
署酌核入

告該軍原非鴻章所轄也

一鐵路試辦擬卽遵來諭由閩莊至沽由沽至津令官商妥議覆  
到卽咨請海署會奏但招股多少遲速俱難逆料凡官可以爲力  
之處自無不竭力助之沽北之路作爲官商合辦調兵運械極爲  
靈便

一用機器繅絲精潔易售較中土繅法尤善洋人爭購獲利可豐  
若令江浙督撫就產絲之地招商集股開辦實係爲民興利並非

與民爭利若官自辦恐有法無人不可持久甘肅織呢局其前鑒也鴻章曩在上海親見旗昌怡和各洋行皆設有機器織絲局募千百華人婦女於其中工賤而絲極美嘉湖絲賣無人仿辦利被彼奪而我絲滯銷心竊惜之津局曾借小樣呈閱卽旗昌之物煙臺織絲局係中外人夥辦買山東野繭織成純熟之絲亦尙得利乃以本錢未足局用不節致虧折中止至今局屋機器皆全惜無挾重貲者接辦頃前廣東巡撫倪文蔚過保定詢粵中是否有機器織絲局據稱粵紳溫子紹曾購機器並未開辦足見興利有效之難日本近多設機器織絲洋商暢銷勝於湖絲十倍中國愧弗如也

一教堂速遷樊國樑曰內來保容再議催俟有辦法再奉聞  
派定防軍並撥的餉

光緒十三年正月二十二日

頃接總辦等呈稱酌撥官兵分禁威海衛大連灣以固渤海門戶  
奏底一件奉諭令閱定寄回於正月二十五日後具奏等因恭讀  
之下仰見盡畫周詳權衡精當欽佩莫名查記名提督劉盛休所  
統銘軍步隊十營馬隊一營久從劉中丞銘傳征戰得力謹將營  
數填入摺內至各口洋藥稅釐併徵現津海東海各關此項藥釐  
均奏明分年儘數撥還神機營前借洋款本息無可勻提統計南  
北各關惟江海關收數最旺浙海次之均未指撥他用不日威海  
衛大連灣防軍齊集先須購礮築臺立等應用必指明有著之款  
庶無掣肘擬於摺內聲敘卽由江海浙海兩關洋藥加釐內歲撥  
三十萬免致懸虛是否有當伏候鑒定謹繳疏稿

議覆臺灣鐵路並津路借款

光緒十三年四月二十日

鈔示劉省三摺片稿令卽酌擬覆陳鴻章查臺灣籌辦海防開擴

商務必以興修鐵路爲根基光緒初年丁雨生早有此議而未果行茲省三招商集議幸有成局殿下主持大計自應樂觀厥成核其所擬章程係由商人借本百萬俟車路造成在於所收腳價內分年償還本利此固外洋恆有之事議息周年六釐雖較津借德債利息稍重而臺路成後貨物出產轉運必多獲利亦必較厚息從路出似尚無妨且聞該官商已與洋行定議亦難再令核減至所請林學士專摺奏事一節自因該學士殷實正派爲商民所信服但止可責令督飭商人委員認真籌辦勿任滋弊失信省三必當綜其綱要應如鈞諭仍由臺灣巡撫領銜會奏爲妥謹遵示僭擬疏稿奉呈察核改正入

告是所至禱由沽北至津一路現已勘丈地基擬及時鳩工修路惟集股尙難踴躍亦擬借款應急大約周年五釐或至多不過五

釐五毫尙未甚定巴使於華泰借款合同添出一條誠恐利歸他人現議鐵路借項英法各銀行爭來詢商不必專用華泰也法商愛禮小鐵路頗多要求已遵示回覆另與他商議訂約價六千金半年運到屆時再候諭遵辦時報世外桃源一段據稱係譯叻報查叻報向多無稽之談臺灣琉球之交本有數小島聞皆荒瘠若如所論物產頗富常與臺灣通貿易臺人當知其略謹卽錄咨省三屬其就近查訪酌辦

論綏鞏軍餉

光緒十二年閏四月初四日

頃接恩總辦等函稱吉林機器局經費不敷擬將吳中丞所部原撥銀二萬兩劃歸吉林今年春季已由北洋承領蒙諭春季之款可否籌還抑由秋季再歸吉林等因遵查吳中丞所部綏鞏各軍前雖歸併北洋其行銷製造局尙未裁撤現調威海衛設防以後

需用軍火尤爲繁巨製造儲備益關緊要所有春季領款業經撥用無存實屬無從籌還祇可自本年秋季起劃歸吉林由該省赴部請領應用惟是綏鞏軍移禁海口實當要地軍火一切皆取給天津機器局該局經費竭蹶萬分頃奉奏撥各關每年洋藥稅釐併徵銀十萬兩並未指定何關協撥若干誠恐緩不濟急可否於此次會奏底內就便聲明由戶部撥給閩海粵海江海浙海四關每年洋藥釐銀各二萬五千兩庶眾擎易舉俾津局停造各廠不致因無款久廢兼供威海要防之需尤深感殿下統籌併顧之盛意

論買基移堂

光緒十三年閏四月初五日

前因樊國樑屢催德稅司轉求移廟以便運木贊工竊恐總署與提督衙門以官勢臨之一時難得妥協鴻章商令向在稅關當差

之胡潔去冬以移堂獲保候選知府者本係京城士著前往設法  
查探情形相機辦理鴻章亦未料該員必可有成是以未先函告  
總署該員到京後未敢張揚竟與慈雲寺尼僧賢良寺方丈等密  
商辦妥始行告知地面官廣協尉廣欲攬辦此事聞向尼僧恫嚇  
尼懼禍誑報而胡亦以拘尼電稟殊屬唐突誠如鈞諭胡於一切  
過節自多疏略地面或不愜意仰見燭照下情無微不至欽感莫  
名此事既經定議務懇勿加深問爲幸至尊慮二層前已令德稅  
司與樊教士函商移廟購價雖由樊發然由胡出名立契仍應作  
爲官地祇可行走車路不准於廟基有所營建旣不至越界侵占  
該教士當感我移廟體恤之意必須早日遷堂不准再執二年成  
約該稅司允其必可辦到鴻章擬派該稅司剋日晉京再與樊堅  
明約束俟移堂定有準期卽就近稟告總署轉達鈞聰樊素信德

諒彼能左右之仍與尊旨及總署初意並無不合可否便中示知  
總署胡灤與尼僧畫押契稿鈔呈鑒察

綜論餉源並山東熱河各礦

光緒十三年六月二十六日

潘道自都回敬詢起居漸臻康泰深慰下懷秋閒續運奉曰等船  
待七里鐵軌接運計自通州登陸繞各門至湖移設殆將十次沙  
路要堅築橫木要穩排不免多費工夫容飭潘道等妥籌前此鐵  
道一里閏動都人惜軌短人推未能曲盡其妙或猶難免浮言將  
來分設外火器營試演捷速當其訝其靈便風氣或自此開也人  
情蹈常習故含實務虛已成痼疾誠誤國計若非

聖母主持於上殿下提倡其閒鴻章何敢破羣議而勉力爲之津  
沽土路已築十之七八爲雨水所阻秋後當再加工事體繁瑣隨  
時督催未知明年七月能告歲否

大婚禮儀用款較上屆節省十之六七儉德爲天下先可爲額手稱慶

禁苑工款及

萬壽山各座落陸續經營截長補短實費盡籌鴻章愧不能效一臂之助英德四快船聞曰內自歐洲開駛八月杪當抵北洋屆時鴻章前往驗駛養船經費仍求鈞署設法挹注各省海防額款催解不前徒爲焦急部收展捐遠不如從前收數恐由庫吏需索使費未若外省招來體恤得法耳洋藥併徵數未增多而各口開銷照章仍不能少似亦無大宗蔓款山東淄川鉛礦甫經開辦工本不貲一時尙難就緒張撫月得二十餘萬之說似懸揣日後礦產旺出而言目前尙無實在把握敝處前派美國礦師哲爾者往勘熱河煙筒山孤山子銀礦據稱上層沙線已經土人挖空洞底水

深數丈無法掏汲若用機器汲水取石開深下面必有大塊銀砂  
亦需洋鑪提鍊開呈需購機器價十餘萬金人工布置一切用款  
在外擬卽以輕息籌借款奏明試辦大凡礦務興利先須花費鉅  
本始可冀獲厚利如開平煤礦用及二百萬經營十餘年今始源  
源收息豈能朝興工而暮取效淄川之鉛平度之金熱河之銀工  
程有大小資本有重輕辦法次第大率類是然果礦產富有乃天  
地自然之利亦須放手爲之任用得人不求速效功成利久當在  
後日十年內外海防用項可略指矣鴻章緘屬張撫逐漸圖維勿  
懈初志想鈞意亦謂然也暑雨不時各河多漫開州北岸向無官  
工民閒近水築埝輒易潰溢下游東境不免波及似尙無礙大局  
永定河南七潰隄潮白河平家疃漫溢順直各屬偏災補救力窮  
深爲愧悚幸連日晴霽高地可獲豐稔差堪仰慰慈塵知縣丁乃

文算學頗精俟其回津遵命妥爲位置

議擬海軍章程奏底

光緒十四年六月初七日

三月間奉鈞電屬將北洋定額兵制駐紮會哨各章程擬底寄京  
公酌會奏等因鴻章巡海回津後卽督飭文武將領悉心籌議雖  
臥病經旬仍與討論不輟午節痊復已來更詳加考覈刻已粗成  
底稿錄交周臬司齎呈鈞閱其餘未盡之言屬周臬司面稟聰聽  
伏祈卓裁改定核辦爲幸竊查各國水師惟英最精最强而法德  
諸國後起學步其規模亦略相仿吾華船政學堂本襲英國成法  
故北洋現在辦法及此次所擬章程大半采用英章其力量未到  
之處或參仿德國初式或仍遵中國舊例蓋人材猝難多得經費  
未能順手量時度勢而有不得不然者也卽就北洋一枝而論英  
員琅威理老於此事每謂船不足用各將領曾出洋肄業游歷見